

四庫全書

集部

欽定四庫全書

文章辨體彙選卷九十六

明 賀復徵 撰

疏十

請立學校疏

東晉戴邈

臣聞天道之所大莫大於陰陽帝王之至務莫重於禮樂是以古之建國有明堂辟雍之制彝有序序黌校之儀皆所以抽導幽滯啟廣才思蓋以六四有困蒙之吝

君子大養正之功也昔仲尼列國之大夫耳興禮修學於洙泗之間四方髦俊斐然向風身達者七十餘人自茲以來千載絕塵豈天下小於魯衛賢哲乏於曩時勵與不勵故也自頃國遭無妄之禍社稷有綴旒之危寇羯飲馬於長江凶狡鷓鴣張於萬里遂使神州蕭條鞠為茂草四海之內人跡不交霸主有旰食之憂黎元懷荼毒之苦戎首交拜於中原何遽遽豆之事哉然三年不為禮禮必壞三年不為樂樂必崩况曠載累紀如此之

久邪今末進後生日不覩揖讓升降之儀耳不聞鐘鼓
管絃之音文章散滅圖讖無遺此蓋聖達之所深悼有
識之所嗟嘆也夫平世尚文遭亂尚武文武並用長久
之道譬之天地昏明之迭自古以來未有不由之者也
今或以天下未一非興禮樂之時此言似之而不其然
夫儒道深奧不可倉卒而成古之俊乂必三年而通一
經比天下平泰然後修之則功成事定誰與制禮作樂
者哉又貴游之子未必有斬將擐旗之才亦未有從軍

征戍之役不及盛年講肄道義使明珠加磨瑩之功荆璞發採琢之榮不亦良可惜乎臣愚以世喪道久人情玩於所習純風日去華競日彰猶火之消膏而莫之覺也今天地告始萬物權輿聖朝以神武之德值革命之運蕩近世之流弊繼千載之絕軌篤道崇儒創立大業明主唱之於上宰輔督之於下夫上之所好下必有過之者焉是故雙劍之節崇而飛白之俗成挾琴之容飾而赴曲之和作君子之德風小人之德草實在感之而

已臣以闇淺不能遠識格言奉誦明令慷慨下風謂宜
乘三時之隙漸就修建

諫移都洛陽疏

孫綽

伏見征西大將軍臣溫表便當躬率三軍討除二寇蕩
滌河渭清灑舊京然後神旂電舒朝服濟江反皇居於
中土正玉衡於天極斯超世之弘圖千載之盛事然臣
之所懷竊有未安以為帝王之興莫不藉地利人和以
建功業貴能以義平暴因而撫之懷愍不建淪胥秦京

遂令胡戎交侵神州絕綱土崩之釁誠由道喪然中夏
蕩蕩一時橫流百郡千城曾無完郭者何哉亦以地不
可守投奔有所故也天祚未革中宗龍飛非唯信順協
於天人而已實賴萬里長江畫而守之耳易稱王公設
險以守其國險之時義大矣哉斯已然之明效也今作
勝談自當任道而遺險校實量分不得不保小以固存
自喪亂已來六十餘年蒼生殄滅百不遺一河洛丘墟
函夏蕭條井堙木刊阡陌夷滅生理茫茫永無依歸播

流江表已經數世存者長子老孫亡者丘隴成行雖北
風之思感其素心目前之哀實為交切若遷都旋軫之
日中興五陵即復緬成遐域泰山之安既難以理保烝
烝之思豈不纏於聖心哉温今此舉誠欲大覽始終為
國遠圖向無山陵之急亦未首決大謀獨任天下之至
難也今發憤忘食忠慨亮到凡在有心孰不致感而百
姓震駭同懷危懼者豈不以反舊之樂賒而趣死之憂
促哉何者植根於江外數十年矣一朝拔之頓驅蹶於

空荒之地提壺萬里踰險浮深離墳墓棄生業富者無
三年之糧貧者無一食之飯田宅不可復售舟車無從
而得捨安樂之國適習亂之鄉出必安之地就累卵之
危將頓仆道塗飄溺江川僅有達者夫國以人為本疾
寇所以為人衆喪而寇除亦安所取裁此仁者所宜哀
矜國家所宜深慮也自古今帝王之都豈有常所時隆
則宅中而圖大勢屈則遵養以待會使德不可勝家有
三年之積然後始可謀太平之事耳今天時人事有未

至者矣一朝欲一宇宙無乃頓而難舉乎臣之愚計以
為且可更遣一將有威名資實者先鎮洛陽於陵所築
二壘以奉衛山陵埽平梁許清一河南漕運之路既通
然後盡力於開墾廣田積穀漸為徙者之資如此賊見
亡徵勢必遠竄如其迷逆不化復欲送死者南北諸軍
風馳電赴若身手之救痛癢率然之應首尾山陵既固
中夏小康陛下且端委紫極增修德政躬行漢文簡樸
之至去小惠節游費審官人練甲兵以養士滅寇為先

十年行之無使隳廢則貧者殖其財怯者克其勇人知
天德赴死如歸以此致政猶運諸掌握何故捨百勝之
長理舉天下而一擲哉陛下春秋方富溫克壯其猷君
臣相與弘養德業括囊元吉豈不快哉今溫唱高議聖
朝互同臣以輕微獨獻管見出言之難實在今日而臣
區區必聞天聽者切以無諱之朝狂瞽進說芻蕘之謀
聖賢所察所以不勝至憂觸冒干陳若陛下垂神溫少
留志豈非屈於一人而允億兆之願哉如以干忤罪大

欲加顯戮使丹誠上達退受刑誅雖沒泉壤尸且不朽

奏去任谷疏

郭璞

任谷所為妖異無有因由陛下玄鑒廣覽欲知其情狀
引之禁內供給安處臣聞為國以禮正不聞以竒邪所
聽惟人故神降之吉陛下簡默居正動遵典刑按周禮
竒服怪人不入宮况谷妖詭怪人之甚者而登講肆之
堂密邇殿省之側塵點日月穢亂天聽臣之私情竊所
以不取也陛下若以谷信為神靈所憑者則應敬而遠

之夫神聰明正直接以人事若以谷為妖蠱作妄者則當投畀裔土不宜令褻近紫闈若以谷或是神祇告譴為國作眚者則當克己修禮以弭其妖不宜令谷安然自容肆其邪變也臣愚以為陰陽陶蒸變化萬端亦是狐狸魍魎憑陵作慝願陛下採臣愚懷特遣谷出臣以人乏忝荷史任敢忘直筆惟義是規

平刑疏

郭璞

臣聞上古象刑而民不犯中古明刑以致刑措故立刑

以禁刑立殺以去殺重之以死所以求其生峻之以刑所以輕其死死由於法輕生存乎法重此立防之成標也然則刑無輕重用之惟平非平法之為難恩在斷之為難是以子臯刑戮則者忘痛釋之典刑民無怨色何者積之於誠也按癸酉詔書之旨專為邊城實之裔土濟當時一切之用非為經遠之法亦是中夏全平之時威御足指控制故可得行之矣欲役無賴子弟驅不逞之人聚之於空荒四維之地將以捍固牧圉未見其利

也且濱接鯨猾密邇姦數退未絕其丘窟之顧進無以塞其逋逃之門五流三品誠古之犯刑論之於今事實難行且律令以跨三代厯載所遵未易輕改者也是以刑法不專則名幸者興政令驟變則人志無繫子產患其如此故矯先政議事之制而立刑書之辟皆所以辟民心而正羣惑者也

文章辨體彙選卷九十六

欽定四庫全書

集部

文章辨體彙選卷九十七至九十九

詳校官中書臣張經田

主事銜臣徐以坤覆勘

總校官檢討臣何思鈞

校對官中書臣高 中

謄錄監生臣王 翰

欽定四庫全書

文章辨體彙選卷九十七

明 賀復徵 編

疏十一

諫高祖不以伶人為近侍疏

唐李綱

臣按周禮均工樂胥不得廁於士伍雖復才如子野妙
等師襄皆身終子繼不易其業故魏武使禰衡擊鼓衡
先解朝服露體而擊之云不敢以先王法服為伶人之

衣惟齊高緯封曹妙達為王授安馬駒為開府既招物
議大戮彛倫有國有家者以為殷鑒方今新定天下開
大平之業起義功臣行賞未徧高才碩學猶滯草萊而
先令舞胡致位五品鳴玉曳組趨馳廊廡故非創業垂
統貽則子孫之道也

諫太宗息兵罷役疏 徐賢妃

自貞觀以來二十有二載風雨調順年登歲稔人無水
旱之弊國無饑饉之災昔漢武守文之常主猶登刻玉

之符齊桓小國之庸君尚圖泥金之望陛下推功損已
讓德不居億兆傾心猶闕告成之禮云亭佇謁未展升
中之儀此之功德足以咀嚼百王網羅千代者矣然古
人有言雖休勿休良有以也守初保末聖哲罕兼是知
大業者易驕願陛下難之善始者難終願陛下易之竊
見頃年以來力役兼總東有遼海之軍西有崑丘之役
士馬疲於甲冑舟車倦於轉輸且召募投戎去留懷死
生之痛因風阻浪往來有漂溺之危一夫力耕卒無數

十之獲一船致損則傾數百之糧是猶運有盡之農工
填無窮之巨浪圖未獲之他衆喪已成之我軍雖除凶
伐暴國有常規然黷武翫兵先哲所戒昔秦王并吞六
國反速危亡之兆晉武奄有三方翻成覆敗之業豈非
矜功恃大棄德而輕邦圖利忘害肆情而縱欲遂使悠
悠六合雖廣不救其亡嗷嗷黎庶因弊以成其禍是知
地廣非常安之術人勞乃易亂之源願陛下布澤流仁
矜弊恤乏減行役之煩增湛露之惠妾又聞為政之本

貴在無為竊見土木之功不可兼遂北闕初建南營翠
微曾未逾時玉華創制雖復因山藉水非無架築之勞
損之又損頗有工力之賞終以茅茨示約猶興木石之
疲假使和雇取人不無煩擾之弊是以卑宮菲食聖王
之所安金屋瑤臺驕主之為麗故有道之君以逸逸人
無道之君以樂樂身願陛下使之以時則力無竭矣用
而息之則人斯悅矣夫珍玩伎巧乃喪國之斧斤珠玉
錦繡實迷心之醜毒竊見服翫織靡如變化於自然職

貢珍竒若神仙之所製雖馳華於季俗實敗素於淳風
是知漆器非延叛之方桀造之而人叛玉杯豈招亡之
術紂用之而國亡方驗侈麗之源不可不過作法於儉
猶恐其奢作法於奢何以制後伏惟陛下明鑒未形智
用無際窮奧秘於麟閣盡探蹟於儒林千王治亂之蹤
百代安危之跡興衰禍福之數得失成敗之機故亦包
吞心腑之中循環目圍之內乃宸衷之久察無假一二
言焉唯恐知之非難行之不易志驕於業泰體逸於時

安伏惟抑意裁心慎終如始削輕過以滋重德擇後是以替前非則鴻名與日月無窮盛業與乾坤永大

德治道疏

魏徵

書稱明德慎罰惟刑之恤禮曰為上易事為下易知則刑不煩上多疑則百姓惑下難知則君長勞夫上易事下易知君長不勞百姓不惑故君有一德臣無二心夫刑賞之本在乎勸善而懲惡帝王所與天下畫一不以親疎貴賤而輕重者也今之刑賞或由喜怒或出好惡

喜則矜刑於法中怒則求罪於律外好則鑽皮出羽惡則洗垢索瘢蓋刑濫則小人道長賞謬則君子道消小人之惡不懲君子之善不勸而望治安刑措非所聞也且暇豫而言皆敦尚孔老至於威怒則專法申韓故道德之旨未弘而刻薄之風先扇昔州犁上下其手而楚法以敝張湯輕重其心而漢刑以謬况人主而自高下乎頃者罰人或以供張不贍或不能從欲皆非致治之急也夫貴不與驕期而驕自至富不與奢期而奢自至

非徒語也且我之所代實在有隋以隋府藏况今之資儲以隋甲兵况今之士馬以隋戶口况今之百姓挈長度大曾何等級焉然隋以富强而喪亂之也我以貧寡而安靜之也靜之則安動之則亂人皆知之非隱而難見微而難察也不蹈平易之塗而遵覆車之轍何哉安不思危治不念亂存不慮亡也方隋未亂自謂必無亂未亡自謂必不亡所以甲兵亟動徭役不息以至戮辱而不悟滅亡之所由也豈不哀哉夫監形之美惡必就

止水監政之安危必取亡國詩曰殷鑒不遠在夏后之
世臣願當今之動靜以隋為鑒則存亡治亂可得而知
思所以危則安矣思所以亂則治矣思所以亡則存矣
存亡之所在在節嗜慾省遊畋息靡麗罷不急慎偏聽
近忠厚遠便佞而已夫守之則易得之實難今既得其
所難豈不能保其所易保之不固驕奢淫泆有以動之
也

十漸疏 魏徵

陛下貞觀之初無為無欲清靜之化遠被遐荒考之於
今其風漸墜聽言則遠超於上聖論事則未踰於中主
何以言之漢文晉武俱非上哲漢文辭千里之馬晉武
焚堆頭之裘今則求駿馬於萬里市珍竒於域外取怪
於道路見輕於戎狄此其漸不克終一也陛下貞觀之
始視人如傷恤其勤勞愛之如子每存簡約無所營為
頃年以來意在奢縱忽忘卑儉輕用人力乃云百姓無
事則驕逸勞役則易使自古以來未有由百姓逸樂而

致傾敗者也何有逆畏其驕逸而故欲勞役之哉此其
漸不克終二也陛下貞觀之初損己以利物至於今日
縱欲以勞人雖憂人之言不絕於口而樂身之事實切
於心或時有所營慮人致諫乃云若不為此不便我身
人臣之情何可復爭此直意在杜諫者之口豈曰擇善
而行者乎此其漸不克終三也立身成敗在於所染蘭
芷鮑魚與之俱化慎乎所習不可不思陛下貞觀之初
砥礪名節不私於物唯善是與親愛君子疎斥小人今

則不然輕褻小人禮重君子重君子也敬而遠之輕小人也狎而近之近之則不見其非遠之則莫知其是莫知其是則不見而自踈不見其非則有時而自昵此其漸不克終四也陛下貞觀之初動遵堯舜投金抵璧反樸還淳頃年以來好尚竒異難得之貨無遠不臻珍玩之作無時而至此其漸不克終五也貞觀之初求賢如渴善人所舉信而任之取其所長恐其不及近歲以來由心好惡或衆善舉而用之或一人毀而棄之或積年

信而任之或一朝疑而遠之夫行有素履事有成跡所
毀之人未必可信於所舉積年之行不應頓失於一朝
且君子之懷蹈仁義而弘大德小人之性好諛佞以為
身謀陛下不省察其根源而輕為之臧否是使守道者
日踈干求者日進所以人思苟免莫能盡力此其漸不
克終六也陛下初登大位高居深視事唯清靜心無嗜
欲內除畢弋之物外絕畋獵之源數載之後不能固志
雖無十旬之逸或過三驅之禮遂使盤遊之娛見譏於

百姓鷹犬之貢遠及於四夷或時教習之處道路遙遠
侵晨而出入夜方還以馳騁為歡莫慮不虞之變事之
不測其可救乎此其漸不克終七也陛下初踐大位敬
以接下君恩下流臣情上達頃年以來多所忽畧或外
官充使奏事入朝思覩闕庭將陳所見欲言則顏色不
接欲請又恩禮不加間因所短詰其細過雖有聰辨之
畧莫能申其忠款而望上下同心君臣交泰不亦難乎此
其漸不克終八也傲不可長欲不可縱樂不可極志不

可滿四者前王所以致禎通賢以為深誠陛下貞觀之
初孜孜理化屈已從人恒若不足頃年以來微自矜放
恃功業之大意蔑前王負聖智之用心輕當代此傲之
長也欲有所為皆取遂意縱或抑情從諫終是不能忘
懷此欲之縱也志在嬉遊情無厭倦雖不全妨政事不
復專心治道此樂將極也率土乂安四夷款服仍遠勞
士馬間罪遐裔此志將滿也親狎者阿旨而不肯言踈
遠者畏威而莫敢諫積而不已將虧聖德此其漸不克

終九也貞觀之初頻年霜早畿內戶口並就關外携負
老幼來往數千曾無一戶逃亡一人怨苦頃年以來疲
於徭役關中之人勞弊尤甚雜匠之徒下日悉留和僱
正兵之輩上番多別驅使和市之物不絕於鄉閭遞送
之步不絕於道路既有所弊易為驚擾脫因水旱穀麥
不收恐百姓之心不能如前日之寧恬此其漸不克終
十也

十思疏 魏徵

臣聞求木之長者必固其根本欲流之遠者必浚其泉源思國之安者必積其德義源不深而望流之遠根不固而求木之長德不厚而思國之安臣雖下愚知其不可而況於明哲乎人君當神器之重居域中之大不念居安思危戒奢以儉斯亦伐根以求木茂塞源而欲流長也凡昔元首承天景命善始者實繁克終者蓋寡豈取之易守之難乎蓋在殷憂必竭誠以待下既得志則縱情以傲物竭誠則吳越為一體傲物則骨肉為行

路雖董之以嚴刑振之以威怒終苟免而不懷仁貌恭
而不心服怨不在大可畏惟人載舟覆舟所宜深慎誠
能見可欲則思知足以自戒將有作則思知止以安人
念高危則思謙冲而自牧懼滿盈則思江海下百川樂
盤遊則思三驅以為度憂懈怠則思慎始而敬終慮墮
蔽則思虛心以納下懼讒邪則思正身以黜惡思所加
則思無因喜以謬賞罰所及則思無以怒而濫刑總此
十思弘茲九德簡能而任之擇善而從之則智者盡其

謀勇者竭其力仁者播其惠信者效其忠文武並用垂拱而治何必勞神苦思代百司之職役哉

請變隋法疏

傅奕

臣聞龍紀火官黃帝廢之咸池六英堯不相治禹不行舜政周不襲湯禮易稱已日乃孚革而信也故曰革之時大矣哉有隋之季違天害民專峻刑法殺戮賢俊天下兆庶同心叛之陛下撥亂反正而官名律令一用隋舊且懲沸羹者吹冷壑傷弓之鳥驚曲木况天下久苦

隋暴安得不新其耳目哉改正朔易服色變律令革官
名功極作樂治終制禮使民知盛德之隆此其時也

上言時政疏

馬周

微臣每讀經史見前賢忠孝之事臣雖小人竊希大道
未嘗不廢卷長思思履其跡臣以不天早失父母犬馬
之養已無所施來事之可為者唯忠義而已是以徒步
二千里而歸於陛下陛下不以臣愚瞽過垂齒錄竊自
顧瞻無階答謝輒以微軀丹款惟陛下所擇臣伏見大

安宮在宮城之西而其墻宇宮闕之制方之紫極尚為
卑小臣伏以東宮皇太子之宅猶處城中大安乃至尊
所居反在城外雖太上皇游心道素志在清儉陛下重
違慈旨愛惜人力而蕃夷朝見及四方觀聽有不足者
臣願營築雉堞修起門觀務從高顯以稱萬國之望則
大孝昭乎天下矣臣又伏見明勅以二月二日幸九成
宮臣竊惟太上皇春秋已高陛下宜朝夕視膳而晨昏
起居今所幸宮去宮三百餘里鑾輿動輒嚴蹕經旬

非可以旦暮至也儻太上皇情或思感而欲即見陛下者將何以赴之且車駕今行本為避暑然則太上皇尚留熱所而陛下自逐涼處溫清之道臣竊未安然勅書已下業已成就願示速返之期以開衆惑臣又見詔書令宗室功臣悉就蕃國貽厥子孫嗣守其政非有大故無或絀免臣竊惟陛下封植之者誠愛之重之欲其胤嗣承守而與國無疆也臣以為必如詔旨者陛下宜思所以安存之富貴之何必使代官也何則以堯舜之

父猶有朱均之子儻在孩童嗣職萬一驕愚則兆庶被其殃而家國蒙其患正欲絕之也則子文之治猶在也正欲存之也則欒廩之惡已彰也與其毒害於見存之百姓則寧使割恩於已亡之一臣明矣然則向所謂愛之者乃適所以傷之也臣謂宜賦以茅土疇其戶邑必有才行隨器方授則雖其翰翮非強亦可以獲免尤累昔漢光武不任功臣以吏事所以終全其代者良得其術也願陛下深思其宜使得奉大恩而子孫終其福祿

也臣又聞聖人之化天下莫不以孝為本故曰孝莫大於嚴父嚴父莫大於配天又曰國之大祀在祀與戎孔子亦云吾不與祭如不祭是聖人之重祭祀也如此伏惟陛下踐祚以來宗廟之享未曾親事伏緣聖情獨以鑾輿一出勞費利多所以忍其孝思以便百姓遂使一代之史不書皇帝入廟之事將何以貽厥孫謨垂則來葉臣知大孝誠不在俎豆之間然則聖人之訓人固有屈己以從物特願聖恩顧省愚款臣又聞致化之道在

於求賢審官為政之基必自揚清激濁故聖人曰惟名與器不可以假人是言慎舉之為重也臣伏見王長通白明達本自樂工與皂雜類韋槃提斛斯正則更無它材獨解調馬縱使術踰儕輩能有可取止賜金帛以富其家豈宜列預士流超受高爵遂使朝會之位萬國來庭騶子倡人鳴玉曳組與夫朝賢君子比肩而立同坐而食臣竊耻之然成命既往縱不可追謂宜不可使在朝班預於士伍也

論時政疏

馬周

臣歷觀前代自夏殷及漢氏之有天下傳祚相繼多者
八百餘年少者猶四五百年皆為積德累業恩結於人
心豈無僻主賴前哲以免自魏晉已還降及周隋多者
不過五六十年少者纔二三十年而亡良由創業之君
不務廣恩化當時僅能自守後無遺德可思故傳嗣之
王政教少衰一夫大呼而天下土崩矣今陛下雖以大
功定天下而積德日淺固當崇禹湯文武之道廣施德

化使恩有餘地為子孫立萬代之階豈欲但令政教無失以持當年而已然自古明王聖主雖因人設教寬猛隨時而大要惟以節儉於身恩加於人二者為務故其下愛之如父母仰之如日月敬之如神明畏之如雷霆此其所以卜祚遐長而禍亂不作也今百姓承喪亂之後比於隋時纔十分之一而供官徭役道路相繼凡去第還首尾不絕遠者往來五六千里春秋冬夏畧無休時陛下雖每有恩詔令其減省而有司作既不廢自然

須人徒行文書役之如故臣每訪問四五年来百姓頗有嗟怨之言以為陛下不存養之昔唐堯茅茨土階夏禹惡衣菲食如此之事臣知不可復行於今漢文帝惜百金之費輟露臺之役集上書囊以為殿帷所幸慎夫人衣不曳地至景帝以錦繡纂組妨害女工特詔除之所以百姓又安後至孝武帝窮奢極侈而承父景遺德故人心不動向使高祖之後即有武帝天下必不能全此於時代差近事跡可見今京師及益州諸處營造器

物并諸王妃公主服飾議者皆不以為儉臣聞作法於治其弊猶亂陛下少處人間知百姓辛苦前代成敗目所親見尚猶若此而况皇太子生長深宮不歷外事即萬歲之後固聖慮所當憂也臣竊尋往代以來成敗之事但有黎庶怨叛聚為盜賊其國無不滅亡人主雖欲改悔未有重能安全者凡脩政教當脩之於可脩之時若事變一起而後悔之則無益也故人主每見前代之亡則知其政教之所由喪而皆不知其身之失是殷紂

笑夏桀之亡幽厲亦笑殷紂之滅隋煬帝大業之後又
笑齊魏之失國然今之視煬帝亦猶煬帝之視齊魏也
故京房謂漢元帝云臣恐後之視今亦猶今之視昔此
言不可不誠往者貞觀之初率土饑儉一匹絹纔得一
斗粟而天下恬然百姓知陛下甚愛憐之故人曾無謗
讟自五六年來頻歲豐稔一匹絹得粟十餘石而百姓
皆以陛下不憂憐之咸有怨言又今所營為者頗多不
急之務故也自古已來國之興亡不由蓄積多少惟在

百姓苦樂且以近事驗之隋家貯洛口倉而李密因之東都積布帛而王充據之西京府庫亦為國家之用至今未盡向使洛口東都無粟帛則王充李密未必能聚大眾但貯積者固是國之常事也要當人有餘力而後收之若人勞而強斂之更以資寇積之無益也然儉以息人貞觀之初陛下已躬為之故今行之不難也為之一日則天下知之式歌且舞矣言人既勞矣而用之不息儻中國被水旱之災邊方有風塵之警狂狡因之以

竊發則有不可測之事非徒聖躬旰食晏寢而已古語云動人以行不以言應天以實不以文以陛下之明誠欲勵精為政不煩遠求上古之術但及貞觀之初則天下幸甚昔賈誼謂漢文帝云可慟哭及長歎息者言當韓信王楚彭越王梁之時使文帝即天子位必不能安又言賴諸王年少傳相制之長大之後必生禍亂歷代以來皆以賈誼為是臣竊觀諸將功臣陛下所與定天下者皆仰稟成規備鷹犬之用無威畧振主如韓彭之

徒難駕御者而諸王年並幼少縱其長大當陛下之日必無它心然則萬代之後不可不慮自漢晉已來亂天下者何嘗不是諸王皆為樹置失宜不先為節制以至滅亡人主熟知其然但溺於私愛故使前車既覆而後車不改轍也今天下百姓極少諸王甚多寵遇之恩有過厚者臣之愚見恐其恃恩驕矜也昔魏武帝寵樹陳思王及文帝即位防守禁閉有同獄囚以先帝加恩太多故嗣主疑而畏之也此則武帝之寵陳思適苦之也

且帝子何患不富貴身食大國封戶不少好衣美食衣食之外更何所須而每年別加優賜曾無紀極里語曰貧不學儉富不學奢言自然也今陛下以大聖創業豈唯處置見在子弟而已當立長久之法使萬代遵行之

諫治洛陽宮疏

張玄素

臣惟秦始皇帝藉周之餘夷六國統一尊將貽之萬世及子而亡者殫嗜奔欲以逆天害人也天下不可以力勝唯當務儉約薄賦斂以身先之乃能大安今東都未

有幸期前事土木戚王出藩又當榮構科調繁仍失兆
人望一不可也陛下向平東都層觀廣殿皆徹毀之天
下翕然一口頌歌豈有初惡侈靡而後好雕麗哉二不
可也陛下每言巡幸者不急之務徒焉虛費今國儲無
兼年又興別都之役以招怨讟三不可也百姓承亂離
之後財賦殫空雖蒙更生意未究定柰何營未幸之都
重耗其力四不可也漢祖將都洛陽叢敬一言即日西
駕非不知地惟土中貢賦所均但形勝不及關內弗敢康

也伏惟陛下化凋弊之俗為日尚淺詎可東巡以搖人心五不可也臣常見隋家造殿伐木於豫章二千人挽一材以鐵為轂行不數里轂輒壞別數百人齎轂隨之終日行不三十里一材之費已數十萬工揆其餘可知也昔阿房成秦人散章華就楚衆離乾陽畢功隋人解體今民力未及隋日而役殘創之人襲亡國弊臣恐陛下之過甚於煬帝

諫伐高麗疏

房玄齡

上古所不臣者陛下皆臣之所不制者陛下皆制之矣
為中國患無如突厥而大小可汗相次束手弛辮握刀
分典禁衛延陀鐵勒披置州縣高昌吐渾偏師掃除惟
高麗歷代逋命莫克窮討陛下責其弑逆身自將六軍
征荒裔不旬日拔遼東虜獲數十萬殘衆孽君縮氣不
敢息可謂功倍前世矣易曰知進退存亡不失其正者
其惟聖人乎蓋進有退之義存有亡之機得有喪之理
為陛下惜者此也傳曰知足不辱知止不殆陛下威名

功烈既云足矣拓地開疆亦可止矣邊夷部落不足待以仁義責以常禮古者以禽魚畜之必絕其類恐獸窮則搏苟救其死且陛下每決死罪必三覆五奏進疏食停音樂以人命之重為感動也今士無一罪驅之行陣之間委之鋒鏑之下使肝腦塗地老父孤子寡妻慈母望楊車抱枯骨摧心掩泣其所變動陰陽傷害和氣實天下之痛也使高麗違失臣節誅之可也侵擾百姓滅之可也能為後世患夷之可也今無是三者而坐敞中

國為舊主雪耻新羅報仇非所存小所損大乎臣願下
沛然之詔許高麗自新焚陵波之船罷應募之衆即臣
死骨不朽

文章辨體彙選卷九十七

欽定四庫全書

文章辨體彙選卷九十八

明 賀復徵 編

疏十二

論河朔人庶疏

唐狄仁傑

臣聞朝廷議者以為契丹作梗始明人之逆順或因迫脅或有願從或為偽官或為招慰或兼外賊或是土人跡雖不同心則無別誠以山東雄猛由來重氣一顧之

勢至死不回近緣軍機調發復重家道悉破或至逃亡
拆屋賣田人不為售內顧生計四壁皆空重以官典侵
漁因事而起取其髓腦曾無媿心修築城池繕造兵器
州縣役使十倍軍機官司不矜期在必取枷杖之下痛
切肌膚事迫情危不脩禮義愁苦之地不樂其生有利
則歸且圖賒死乃君子之愧辱小人之常行人猶水也
壅之則為泉疏之則為川通塞隨流豈有常性昔董卓
之亂神器播遷及卓被誅部曲無赦事窮變起毒害生

人京室丘墟化為禾黍此由恩不普決失在機先臣一
讀此書未嘗不掩卷歎息今以負辜之人必不在家露
宿草行潛竄山澤赦之則出不赦則狂山東羣盜緣茲
聚結臣以邊塵暫起不足為憂中土不安以此為事臣
聞持大國者不可以小理事廣澤者不可以細分人主
恢弘不拘常法罪之則衆情恐懼恕之則反側自安伏
願曲赦河北諸州一無所問自然人神通暢率土歡心
諸道凱旋得無侵擾

諫除濫刑疏

朱敬則

臣聞李斯之相秦也行中商之法重刑名之家杜私門
張公室棄無用之費損不急之官惜日愛功疾畊急戰
人繁國富乃屠諸侯此救弊之術也故曰刻薄可施於
進趨變詐可陳於攻戰兵猶火也不戢將自焚况鋒鏑
已銷石城又毀諒可易之以寬秦潤之以淳和八風之
樂以柔之三代之禮以導之秦既不然淫虐滋甚往而
不返卒至土崩此不知變之禍也陸賈叔孫通之事漢

主也當滎陽成臯之間糧饋已窮智勇俱困不敢開一
說效一奇惟進豪猾之才薦貪暴之客及區宇適平干
戈向戢金鼓之聲未歇傷痍之痛尚聞二子顧盼綽有
餘態及陳詩書說禮樂開王道謀帝圖高皇忽曰吾以
馬上得之安事詩書乎對曰馬上得之可馬上理之乎
高皇默然於是陸賈著新語叔孫通定禮儀始知天子
之尊此知變之善也向使高皇排二子而不教置詩書
而不顧重攻戰之吏尊首級之材複道爭功張良已知

其變拔劔擊柱吾屬不得無謀即罅漏難逾何二十帝
乎亡秦是續何二百年乎故曰仁義者聖人之蘧廬禮
經者先王之陳迹然則祝辭向畢芻狗須投淳精已流
糟粕可棄仁義尚捨况輕此者乎自文明草昧天地屯
蒙二叔流言四凶構難不設鉤距無以應天順人不切
刑名不可推姦息暴故置神器開告端曲直之影必呈
包藏之心盡露神道助直無罪不除人心保寧無妖不
戮以茲廟算窮造化之幽深用此神謀入天人之秘術

故能計不下席聽不出闈蒼生晏然紫宸易主大哉偉
哉無得而稱也豈比造攻鳴條大戰牧野血變草木頭
折不周可同年而語乎然而急趨無善迹促柱少和聲
拯溺不規行療饑非鼎食即向時之妙策乃當今之芻
狗也伏願覽秦漢之得失考時事之合宜審糟粕之可
遺覺蘧廬之須毀見機而作豈勞終日乎陛下必不可
偃蹇太平徘徊中路伏願改法制立章程下恬愉之辭
流曠蕩之澤斷萋菲之牙角頓姦險之鋒芒塞羅織之

源掃朋黨之迹使天下蒼生坦然大悅豈不樂哉

請則天皇后復位於皇太子疏

蘇安恒

臣聞忠臣不順時而取寵烈士不惜死而偷生故君道不明者忠臣之過歟臣道不軌者烈士之過歟昔者先皇晏駕留其顧託將以萬幾殷廣令陛下兼知政事雖唐堯虞舜居其位而共工伯鯨在其朝間陛下骨血之恩阻陛下母子之愛愚臣謂聖情以運祚將衰極斯大節天下之人謂陛下微弱李氏貪天之功何以年在耄

倦而不能復子明辟使忠言莫進姦佞成朋夷狄紛擾
屠害黎庶陛下雖納隍軫念亦何能救此生靈臣聞天
下者神堯文皇之天下也昔有隋失馭小人道長羣雄
駭鹿四海瞻烏皇唐親事戎旃鳳翔參野削平寓縣龍
飛踐極挿血為盟指河為誓非李氏不王非功臣不封
陛下雖居正統實因唐氏舊基故詩曰惟鵲有巢惟鳩
居之此言雖小可以喻大陛下自坤生德乘乾作主豈
不以上符天意下順人心東宮昔在諒陰相王又非長

子陛下恐宗祀中絕所以應其謳歌當今太子追迴年
德俱盛陛下貪其實位而忘母子深恩臣聞京邑翼翼
四方所視陛下蔽太子之元良枉太子之神器何以教
天下毋慈子孝焉何能使天下移風易俗焉惟陛下思
之將何聖顏以見唐家宗廟將何誥命以謁大帝墳陵
陛下何故日夜積憂不知鐘鳴漏盡臣愚以為天意人
事還歸李家陛下雖安天位殊不知物極則反器滿則
傾故語曰當斷不斷反受其亂此之謂也陛下不如高

揖樞務自怡聖躬命史臣以書之令樂府以歌之斯亦
太平之盛事也臣間見過不諫非忠臣也畏死不言非
勇士也臣何惜一朝之命而不安萬乘之國哉故曰苟
利國家雖死可矣願陛下暫輟萬幾詳臣愚見陛下若
以臣為忠則從諫如流擇是而用若以臣為不忠則斬
取臣頭以令天下

救魏元忠疏

蘇安恒

王者有容天下之量故濟其心能進天下之善故除其

惡不然則神鬼憑怒陰陽紛舛陛下始革命勤秉政樞
博選謀猷天下以為明主暮年厭怠讒佞熾結水火相
災百姓不親五品不遜天下以為暗君邪正糝進獄訟
冤劇何昔是而今非邪居安忘危之失也竊見元忠廉
直有名位宰相履中正邪佞之徒嫉之若讎易之兄弟
無功無德但以馮附不閱數暮位勢隆極拍馬獻蒲先
害善良自元忠下獄人人偶語謂易之交亂且及四國
烈士撫髀忠臣鉗口懼易之之權恐先諫受戮虛死無

名况賊虜方彊賦歛重困而自縱讒慝搖變遐邇臣恐
四夷低目窺覘為邊鄙患百姓託義以清君側逐鹿之
人叩闕而至陸衛左右從中以應爭鋒朱雀之門問鼎
大明之宮陛下何以謝之臣今計者莫若收雷電之威
解恢恢之網復爵還位君臣如初則天下幸甚陛下縱
不能斬佞臣塞人望且當抑奪榮寵剪其羽翅無使驕
橫為社稷之憂

諫韋后豫政疏

桓彥範

詩以關雎為始言后妃者人倫之本治亂之端也故舜之興以皇英而周之興以任姒桀奔南巢禍階妹喜魯桓滅國禍始齊姜伏見陛下臨朝視政皇后必施帷殿上預聞政事臣愚謂古王者謀及婦人皆破國亡身傾軛繼路且以陰乘陽違天也以婦凌夫違人也違天不祥違人不義故書曰牝雞之晨惟家之索易曰無攸遂在中饋言婦人不得豫外政也伏願上以社稷為重令皇后無居正殿干外朝深居宮掖修陰教以輔佐天子

又道路籍籍皆云胡僧慧範託浮屠法詭惑后妃出入
禁輿瀆撓朝政陛下嘗輕騎微服數幸其居上下污慢
君臣虧替臣謂興化致治以康乂國家者由進善而棄
惡孔子曰執左道以亂政者殺假鬼神以危人者殺今
慧範亂政危人者也不急誅且有變除惡務本願早裁
之

陳時政疏

辛替否

古之建官不必備九卿有位而闕其選故賞不僭官不

濫士有完行家有廉節朝廷餘奉百姓餘食下忠於上
上禮於下委裘無倉卒之危垂拱無顛沛之患夫事有
惕耳目動心慮事不師古以行於今臣得言之陛下倍
百行賞倍十增官金銀不供於印束帛不充於錫何所
媿於無用之臣無力之士哉古語曰福生有基禍生有
胎且公主陛下愛子也選賢嫁之設官補之傾府庫以
賜之壯地觀以居之廣池籩以嬉之可謂至重至憐也
然用不合古義行不根人心將變愛成憎轉福為禍何

者竭人之力費人之財奪人之家怨也愛一女取三怨
於天下使邊疆士不盡力朝廷士不盡忠人心散矣獨
持所愛何所持乎向使魯王賞同諸壻則有今日之福
無曩日之禍人徒見其禍不知禍所從來所以禍者寵
過也今棄一宅造一宅忘前悔思後禍臣竊謂陛下乃
憎之非愛之也臣聞君以仁為本本固則邦寧邦寧則
陛下夫婦母子長相保也願外謀宰臣為久安計不使
奸臣賊子有以伺之今疆場危駭倉廩空虛卒輸不充

士賞不及而大建寺宇廣造第宅伐木空山不給梁棟
運土塞路不充墻壁所謂佛者清淨慈悲體道以濟物
不欲利以損人不榮身以害教今三時之月掘山穿地
損命也殫府虛帑損人也廣殿長廊榮身也損命則不
慈悲損人則不愛物榮身則不清淨寧佛者之心乎昔
夏為天子二十餘世而商受之商二十餘世而周受之
周三十餘世而漢受之由漢而後歷代可知已咸有道
之長無道之短豈窮金玉修塔廟享長久之祚乎臣以

為減彫琢之費以賑不足是有佛之德息穿掘之苦以
全昆蟲是有佛之仁罷營構之直以給邊陲是有湯武
之功回不急之祿以購庶清是有唐虞之治陛下緩其
所急急其所緩親未來疏見在失真實冀虛無重俗人
之所為而輕天子之業臣竊痛之今出財依勢避役亡
命類度為沙門其未度者窮民善人耳拔親樹知豈離
朋黨畜妻養孥無非私愛是致人毀道非廣道求人也
陛下常欲填池澗捐苑囿以賑貧人今天下之寺無數

一寺當陛下宮壯麗用度尚或過之十分天下之財而佛有七八陛下何有之矣雖役不食之人不衣之士猶尚不給况必待天生地養風動雨潤而後得之乎臣聞國無九年之儲曰非其國今計倉廩度府庫百僚供給萬事用度臣恐不能卒歲假如兵旱相乘則沙門不能掇甲冑寺塔不足攘饑饉矣

勸還三陽宮疏

張說

宮距洛城百六十里有伊水之隔崿坂之峻過夏涉秋

水滂方積道壞山險不通轉運河廣無梁咫尺千里扈
從兵馬日費資饗太倉武庫並在都邑紅粟利器蘊若
山丘柰何去宗廟之上都安山谷之僻處是猶倒持劍
戟示人鐔柄臣竊為陛下不取夫禍變之生在人所忽
故曰安樂必戒無行所悔不可一也官城褊小萬方輻
湊填郛溢郭併鋪無所排斥居人蓬宿草次風雨暴至
不知庇託孤惻老病流轉衢巷陛下作人父母將若之
何不可二也池亭竒巧蕩誘上心削巒起觀塌流漲海

俯貫地脉仰出雲路易山川之氣奪農桑之土延木石
運斧斤山谷連聲春夏不輟勸陛下作此者豈正人耶
詩云民亦勞止迄可小康不可三也御苑東西二十里
外無墻垣扁禁內有榛叢豁谷猛毅所伏暴慝所憑陛
下往往輕行警蹕不肅歷蒙密乘險賊卒有逸獸狂夫
驚犯左右豈不殆哉易曰思患豫防願為萬姓持重不
可四也今北有胡寇覩邊南有夷獠騷徼關西小旱耕
稼是憂安東近平輸漕方始臣願及時旋軫深居上京

息人以展農修德以來遠罷不給之役省無用之費澄
心澹懷惟億萬年蒼蒼羣生莫不幸甚

諫造大像疏

李嶠

造像雖俾浮屠輸錢然非州縣承辦不能濟是名雖不
稅而實稅之臣計天下編戶貧弱者衆有賣舍帖田供
王役者今造像錢積十七萬緡若頒之窮人家給千錢
則紓十七萬口饑寒之苦德無窮矣

請禁絕突厥吐蕃契丹侍子疏

薛登

臣聞戎夏不雜古所戒也故斥居塞外有時朝謁已事則歸三王之法也漢魏以來革襲衣冠築室京師不令歸國較其利害三王是而漢魏非拒邊長而質子短昔晉郭欽江統以夷狄處中夏必為變武帝不納卒有永嘉之亂伏見突厥吐蕃契丹往因入侍並被獎遇官戎秩步黻門服改羶屬語習楚夏窺圖史成敗熟山川險易國家雖有冠帶之名而狼子狐思患必在後昔申公奔晉使子孤庸為吳行人教吳戰陣使之叛楚漢遣五

部匈奴於汾晉卒以劉石作難竊計秦并天下及劉項用兵人士凋散以冒頓之盛乘中國之虛而高祖困厄平城匈奴卒不入中國者以其生長積漠謂穹廬賢於城郭疆屬美於章紱既安所習是以無窺中國心不樂漢故也元海五部散亡之餘而能自振者少居內地明習漢法鄙單于之陋竊帝王之稱使其未嘗內徙不過劫邊人縉綵麩藥歸陰山而已今皇風所覃含識革面方由余效忠日殫盡節然臣慮備豫不謹則夷狄稱兵

不在方外非貽謀之道臣謂願充侍子可一切禁絕先
在國者不使歸藩則夷人保疆邊邑無爭

文章辨體彙選卷九十八

欽定四庫全書

文章辨體彙選卷九十九

明 賀復徵 編

疏十三

論方技鄭普思疏 唐李邕

陛下躬政日淺有九重之嚴未聞道路橫議今藉藉皆
言普思馮詭惑說妖祥陛下不知猥見驅使孔子曰詩
三百一言以蔽之曰思無邪陛下誠以普思術可致長

生則與鳩氏且因之永有天下非陛下乃今可得能致
神人邪秦漢且因之永有天下非陛下乃今可得能致
佛法耶梁武帝且因之永有天下非陛下乃今可得能
鬼道耶墨翟干寶且各獻其主永有天下非陛下乃今
可得自古堯舜稱聖者臣觀所以行皆在人事敦睦九
族平章百姓不聞以鬼神道治天下惟陛下省察

救夫李邕疏

温比

邕少習文章疾惡如讐不容於衆邪佞切齒諸儒側目

頻謫遠郡削跡朝端不啻十載歲時感歎聞者傷懷屬
國家有事泰山法駕旋路邕獻牛酒例蒙恩私妾聞正
人用則佞人憂邕之禍端故自此始且邕比任外官卒
無一毀天意暫顧罪過旋生諺曰士無賢不肖入朝見
嫉惟陛下明察邕初蒙訊責便繫牢戶水不入口者踰
五日氣息奄奄惟史是聽事生史口迫邕手書貸人蠶
種以為枉法市羅貢奉指為奸賊於時匭使朝堂守捉
嚴固號天訴地誰肯為聞泣血去國投骨荒裔永無還

期妾願使邕得充一卒効力王事膏塗朔邊骨糞沙壤
成邕夙心

請代李邕死疏

孔璋

明主舉能而捨過取才而棄行烈士抗節勇者不避死
故晉用林父不以過漢任陳平不以行禽息隕身不祈
生北郭碎首不愛死向若林父誅陳平死百里不用晏
嬰見逐是晉無赤狄之土漢無天子之尊秦不强齊不
霸矣伏見陳州刺史邕剛毅忠烈難不苟免往者折二

張之角挫韋氏之鋒雖身受謫屈而奸謀沮解卽邕有功於國且邕所能者拯孤恤窮救乏調惠家無私聚今聞坐臧下吏死在旦夕臣聞生無益於國者不若殺身以明賢臣願以六尺之軀膏鈇以代邕死臣與邕生平不款曲臣知有邕邕不知有臣臣不逮邕明矣夫知賢而舉仁也任人之患義也獲二善以死臣又何求伏惟陛下寬邕之死使率德改行興林父曲逆之功臣得瞑目附禽息北郭之迹大願畢矣若以陽和方始重行大

戮則臣請伏劍不敢煩有司皇天后土實聞臣言昔吳楚反漢得劇孟則不憂夫以一賢而敵七國之衆伏惟敷舍垢之道棄瑕之義遠思劇孟近取於邕况告成岱宗天地更新赦而復論人誰無罪惟明主圖之臣聞士為知己者死臣不為死者所知而甘之死者非特惜邕賢亦以成陛下矜能之慈

諫坊邑渾脫疏

呂元泰

國家者至公之神器一正則難傾一傾則難正今中興

政化之始幾微之際可不慎哉自頃營寺塔度僧尼施
與不絕非所謂急務也林胡數叛獯虜內侵帑藏虛竭
戶口亡散天下人失業不謂太平邊兵未解不謂無事
水旱為災不謂年登倉廩未實不謂國富而乃驅役饑
凍彫鏤木石營構不急勞費日深恐非陛下中興之要
也比見坊邑相索為渾脫隊駿馬胡服名曰蘇莫遮旗
鼓相當軍陣勢也騰逐喧噪戰爭象也錦繡夸競害女
工也督斂貧弱傷政體也胡服相歡非雅樂也渾脫為

號非美名也安可以禮義之朝法胡虜之俗詩云京邑翼翼四方是則非先王之禮樂而示則於四方臣所未
諭

諫玄宗不令突厥入仗馳射疏

呂向

臣聞鷓鴣不鳴未為瑞鳥豺虎雖伏豈齊仁獸是由醜
性毒行久務常積故也今夫突厥者正與此類安忍殘
賊莫顧君親陛下持武義臨之修文德來之既懼威靈
又沐聲教以力以勢不得不庭故稽顙稱臣奔命遣使

陛下乃能收其傾效雜以從官赴封禪之禮參玉帛之
會此德業自盛固不可名焉因復詔許侍遊召入禁仗
仰英姿之四照送神藝之百發恩意俱極誠無得踰焉
乃更賜以馳逐使操弓矢競飛鏃於前同獲獸之樂是
屑畧大過未敢取也雖聖胸豁達與物無猜而愚臣排
徊與時加慄儻此等各懷犬吠交肆盜憎荆卿詭動何
羅竊至斃逼巖蹕稍冒清塵悔將何及

自陳疏

杜甫

先臣恕預以來承儒守官十一世迨審言以文章顯中宗時臣賴緒業自七歲屬辭且四十年然衣不蓋體常寄食於人竊恐轉死溝壑伏惟天子哀憐之若令執先臣故事拔泥塗之久辱則臣之述作雖不足鼓吹六經至沈鬱頓挫隨時敏給揚雄枚舉可企及也有臣如此陛下其忍棄之

請誅程元振疏

柳伉

臣出身事君忝備近密夙有志願銘之在心若遭艱危

必死王事當今日之際是臣死之秋將死之言庶裨萬
一特乞陛下少垂聽覽則甘就鼎鑊且天生四夷皆習
戰鬪輕走易北獨有犬戎數萬之師犯關度隴歷秦渭
收汾涇曾不血刃直至城闕館穀向有三載縣地數踰
千里謀臣不為陛下陳一言武士不為陛下效一戰各
攜卒伍剽劫閭閻汙辱宮闈燒焚陵寢者何故此將帥
之心叛陛下也自朝義東滅迴紇北歸陛下以為智力
所能神明所贊委權近貴失意元勳日引月長浸成大

禍陛下侍臣載路多士盈庭竟無一人折檻牽裾犯顏
迴慮至使北捐汾浦西失秦川者何故此公卿之心叛
陛下也陛下出城之日鑿駕未動京師百姓劫奪府庫
城外百姓更相殺戮者何故此三輔之心叛陛下也自
九月二十八日聞有警急十月一日下詔徵兵至今幾
四十日矣天下兵一人不至何故此四海之心叛陛下
也近自京輔遠至海隅文武百寮志皆離叛雖有朝恩
戮力陝郡堅城陛下獨能長守社稷乎今臣所言四者

皆叛陛下以為虛邪實邪若以為實陛下以今日之事
為安邪危邪若以為危陛下宜得高枕而卧不決大計
臣聞良醫之療病也必審觀病源當病投藥若不當病
療之無益陛下知今日之病何因至此臣實知之請言
其故何者天下之心皆恨陛下不練士卒踈遠賢良委
任宦官離間將相以至於此陛下必欲救今日之急存
宗廟社稷即請斬元振之首懸示天下盡出內使配隸
諸州以朝恩勲勞留在左右仍以神策兵馬迴付漢官

使朝臣百寮每日坐議左右使令盡用文武然後明詔
大下削去尊號引過歸已深自刻責誓與下寮將相率
德勵行後宮嬪妃且移別院與宰相已下晝夜論政下
詔云若天下勲臣知予自新許予改過即召募將士來
赴朝廷若以為舊惡未悛修身有闕則帝王大器敢妨
聖賢聽天下所往也陛下若納臣此言行臣所請一月
之內天下兵馬若不雲集闕下臣請闔門寸斬以謝陛
下伏乞陛下讀臣此表一二十徧親與朝廷商量事若

可行則自處置不用露臣此表臣今日上表即知萬死
但願行之死無所恨陛下若違臣所請更無長策社稷
重事伏惟陛下審圖之

諫晏朝疏

李渤

今日入閣陛下不時見羣臣羣臣皆布路跛倚夫跛倚
形諸外則憂思結諸內憂倦既積災釁必生小則為旱
為孽大則為兵為亂禮三諫不聽則逃之陛下新即位
臣至三諫恐危及社稷又左右常侍職規諷循默不事

若設官不責實不如罷之

諫餌丹藥疏

裴潁

臣聞除天下之害者受天下之利共天下之樂者饗天下之福故上自黃帝顓頊堯舜禹湯下及周文王武王咸以功濟生靈德配天地故天皆報之以上壽垂祚於無疆伏見陛下以大孝安宗廟以至仁牧黎元自踐祚已來剋積代之妖克開削平之洪業而禮敬宰輔待以終始內能大斷外寬小故夫此神功聖化皆自古聖主

明君所不及陛下躬親行之實光映千古矣是則天地
神祇必報陛下以山岳之壽宗廟聖靈必福陛下以億
萬之齡四海蒼生咸祈陛下以覆載之永自然萬靈保
祐聖壽無疆伏見自去年已來諸處頻薦藥術之士有
韋山甫栢泌等或更相稱引迄今狂謬薦送漸多臣伏
以真仙有道之士皆匿其名姓無求於世潛遯山林滅
影雲壑惟恐人見惟懼人聞豈肯干謁公卿自鬻其術
今者所有誇眩藥術者必非知道之士咸為求利而來

自言飛鍊為神以誘權貴賄賂大言怪論驚聽惑時及其假偽敗露曾不耻於逃遁如此情狀豈可保信其術親餌其藥哉禮曰夫人食味別聲被色而生者也春秋左氏傳曰味以行氣氣以實志又曰水火醯醢鹽梅以烹魚肉宰夫和之齊之以味君子食之以平其心夫三牲五穀稟自五行發為五味蓋天地生之所以奉人也是以聖人節而食之以致康強逢吉之福若夫藥石者前聖以之療疾蓋非常食之物况金石皆含酷烈熱毒

之性加以燒治動經歲月既煎烈火之氣必恐難為防
制若乃遠徵前史則秦漢之君皆信方士如盧生徐福
藥大李少君其後皆奸偽事發其藥竟無所成事著史
記漢書皆可驗視禮曰君之藥臣先嘗之親之藥子先
嘗之臣子一也臣願所有金石鍊藥人及所薦之人皆
先服一年以考其真偽則自然明驗矣伏惟元和聖文
神武法天應道皇帝陛下合日月照臨之明稟乾元利
貞之德崇正若指南受諫如轉規是必發精金之刃斷

可疑之網所有藥術虛誕之徒伏乞特賜罷遣禁其幻惑使浮雲盡徹朗日增輝道化侔羲農悠久配天地實在此矣伏以貞觀已來左右起居有褚遂良杜正倫呂向韋述等咸能竭其忠誠悉心規諫小臣謬參侍從職奉起居侍從之中最近左右傳曰近臣盡規則近侍之臣上達忠款實其本職也

止藥餌疏

李德裕

臣聞道之高者莫如廣成玄元人之聖者莫若軒皇孔

子昔軒皇問廣成子理身之要何以長久廣成子云無
視無聽抱神以靜形將自正神將自清無勞子形無搖
子精乃可長生慎守其一以處其和故我修身千二百
歲矣吾形未嘗衰又云得吾道者上為皇而下為王玄
元語孔子云去子之驕氣與多欲態色與淫志是皆無
益於子之身吾所告子者是已故軒皇發謂天之歎孔
子興猶龍之感前聖於道不其至乎伏惟文武大孝廣
聖皇帝陛下稽玄祖之訓修軒皇之術凝神閭館物色

異人將以覲冰雪之姿屈順風之請恭惟聖感必降真
仙若使廣成玄元混迹而至語陛下之道授陛下之言
以臣度思無出於此臣所慮赴召者必怪迂之士苟合
之徒使物淖冰以為小術銜耀邪僻蔽欺聰明如文成
五利無一可驗臣所以三年之內四奉詔書未敢以一
人塞詔實有所懼臣又聞前代帝王雖好方士未敢有
服其藥者故漢書稱黃金可成以為飲食器則益壽又
高宗朝劉道合玄宗朝孫甌生皆成黃金二祖竟不敢

服蓋以宗廟社稷之重不可輕易此事炳然具載國史
以臣微見儻陛下睿思精求必致真隱惟問保和之術
不求藥餌之功縱使必成黃金止可充於玩好則九廟
靈鑒必當慰悅寰海兆庶誰不懽心臣思罄愚衷以裨
玄化輒陳懇款伏積兢皇

請旌劉蕡直言疏

李劄

陛下御正殿求直言使人得自奮臣才志懦劣不能質
古今是非使陛下聞未聞之言行未行之事忽忽內思

愧羞神明今蕢所對敢空臆盡言至皇王之成敗陛下
所防閑時政之安危不私所料又引春秋為據漢魏以
來無與蕢比有司以言涉訐忤不敢聞自詔書下萬口
籍籍歎其誠鯁至於垂泣謂蕢指切左右畏近臣銜怒
變興非常朝野惴息誠恐忠良道窮網紀遂絕季漢之
亂復興於今以陛下仁聖近臣故無害忠良之謀以宗
廟威嚴近臣故無速敗亡之禍指事取驗何懼直言且
陛下以直言召天下士蕢以直言副陛下所問雖訐必

容雖過當獎書於史策千古光明使萬有一賁不幸死
天下必曰陛下陰殺讜直結讎海內忠義之士皆憚誅
夷人心一搖無以自解况臣所對不及賁遠甚內懷愧
耻自謂賢良奈人言何乞回臣所授以旌賁直臣逃苟
且之慙朝有公正之路陛下免天下之疑顧不美哉

請追癸巳日詔疏


羅隱

歲貢賤臣隱既以文不得意且抱犬馬之疾於長安夏
五月京畿旱癸巳日聞詔大京兆用噐水鑪香蒲蕭絳

幢輦致於坊市門將所以用舊法而召雨也臣躄起病榻間以為明天子憂人雖禹舜不如是之勤幸甚幸甚臣又聞水旱與天地同出苟時或然不可以倉卒除去今秦地早已逾月矣而陛下禱祀亦以頻矣天之高地之厚五嶽之縣亘四瀆之宏遠陛下命百執事啓祈外何嘗不以心祝之雖莖稊苗乾而百姓不怨嗟者其感陛下之誠深也今以蒲蕭葦為請者豈陛下為其靈於嶽瀆者乎夫嶽瀆視陛下之公輔列陛下之土田苟陸

下憂則獄瀆亦宜憂矣受祭據封者尚未能為陛下出力彼蒲蕭葦復何足以動天臣為陛下不取也臣又聞天之有雨澤猶陛下之有渥恩雨澤可以委曲干之則陛下渥恩亦可以委曲干之矣臣聞天子有左右史將所以記事記言然後付太史氏臣必恐其得以容易編牘今冒死請追癸巳日詔苟若陛下落十六聖之教訓雖五種栖野而百姓不暇扱豈蒲蕭葦之所及乎哉昔殷湯之代不以旱為災仁聖之君在上也今旱未及殷

代而陛下憂已過臣請因早以賀萬姓俾其知陛下心



文章辨體彙選卷九十九

欽定四庫全書

集部

文章辨體彙選卷

一百至
一百二

詳校官中書臣張經田

主事銜臣徐以坤覆勘

總校官檢討臣何思鈞

校對官編修臣沈清藻

謄錄監生臣沈應麟

欽定四庫全書

文章辨體彙選卷一百

明 賀復徵 編

疏十四

論安邊疏

宋張齊賢

方今海內一家朝野無事闕聖慮者豈不以河東新平
屯兵尚衆幽燕未下輦運為勞臣愚以為此不足慮也
自河東初下臣知忻州捕得契丹納米典史皆云自山

後轉般以授河東以臣料契丹能自備軍食則於太原非不盡力然終為我有者力不足也河東初平人心未固嵐憲忻代未有軍砦入寇則田牧頓失擾邊則守備可虞及國家守要害增壁壘左控右扼疆事甚嚴恩信已行民心已定乃於鴈門陽武谷來爭小利此其智力可料而知也聖人舉事動在萬全百戰百勝不若不戰而勝若重之慎之則契丹不足吞燕薊不足取自古疆場之難非盡由敵國亦多邊吏擾而致之若緣邊諸砦

撫御得人但使峻壘深溝畜力養銳以逸自處寧我致
人此李牧所以用趙也所謂擇卒不如擇將任力不如
任人如是則邊鄙寧邊鄙寧則輦運減輦運減則河北
之民獲休息矣民獲休息則田業增而蠶績廣務農積
穀以實邊用且敵人之心固亦擇利避害安肯投諸死
地而為寇哉臣聞家六合者以天下為心豈止爭尺寸
之事角強弱之勢而已乎是故聖人先本而後末安內
以養外人民本也疆土末也五帝三王未有不先根本

者也堯舜之道無他在乎安民而利之爾民既安利則
遠人歛衽而至矣陛下愛民人利天下之心真堯舜也
臣慮羣臣多以纖微之利尅下之術侵苦窮民以為功
能至於生民疾苦見之如不見聞之如不聞歛怨速尤
無大於此伏望慎擇通儒分路採訪兩浙江南荆湖西
川嶺南河東凡前日賦歛苛重者改而正之因而利之
使賦稅課利通濟可經久而行為聖朝定法除去舊弊
天下諸州有不獲於民者委長吏以聞敢循故常者重

寘之法使天下人耳目皆知陛下之心戴陛下之惠以
德懷遠以惠刑民則遠人之歸可立而待也

諫幸汾陰疏

孫奭

先王卜征五年歲習其祥祥習則行不習則增修德而
改卜陛下始畢東封更議西幸殆非先王卜征五年慎
重之意其不可一也夫汾陰后土事不經見昔漢武帝
將封禪故先封中嶽祠汾陰始巡幸郡縣遂有事於泰
山今陛下既已登封復欲幸汾陰其不可二也古者圓

丘方澤所以郊祀天地今南北郊是也漢初承秦唯立五時以祀天而后土無祀故武帝立祠於汾陰自元成以來從公卿之議遂徙汾陰后土於北郊後之王者多不祀汾陰今陛下已建北郊乃舍之而遠祀汾陰其不可三也西漢都雍去汾陰至近今陛下經重關越險阻輕棄京師根本而慕西漢之虛名其不可四也河東唐王業之所起也唐又都雍故明皇間幸河東因祀后土聖朝之興事與唐異而陛下無故欲祀汾陰其不可五

也昔者周宣王遇災而懼故詩人美其中興以為賢主
比年以來水旱相繼陛下宜側身修德以答天譴豈宜
下狗姦回遠勞民庶盤游不已忘社稷之大計其不可
六也夫雷以二月起蟄八月收聲育養萬物失時則為
異今震雷在冬為異尤甚此天意丁寧以戒陛下而反
未悟殆失天意其不可七也夫民神之主也是以聖王
先成民而後致力於神今國家土木之功累年未息水
旱洊臻饑饉居多乃欲勞民事神神其享之乎此其不

可八也陛下必欲為此者不過效漢武帝唐明皇巡幸所至刻石頌功以崇虛名夸示後世爾陛下天資聖明當慕二帝三王何為下襲漢唐之虛名其不可九也唐明皇以嬖寵姦邪內外交害身播國屯兵交關下亡亂之迹如此由狃於承平肆行非義稔致禍敗今議者引開元故事以為盛烈乃欲倡導陛下而為之臣切為陛下不取此其不可十也臣言不逮意陛下以臣言為可取願少賜清問以畢臣說

再諫祀汾陰疏

孫奭

陛下將幸汾陰而京師民心弗寧江淮之衆困於調發
急須鎮安而矜存之且土木之功未息而奪攘之盜公
行外國治兵不遠邊境使者雖至寧可保其心乎昔陳
勝起於徭戍黃巢出於凶饑隋煬帝勤遠畧而唐高祖
興於晉陽晉少主惑小人而耶律德光長驅中國陛下
俯從姦佞遠棄京師涉仍歲薦饑之墟修違經久廢之
祠不念民疲不恤邊患知今日戍卒無陳勝饑民無

黃巢英雄將無窺伺於肘腋外敵將無觀釁於邊陲乎
先帝嘗議封禪寅畏天災尋詔停寢今姦臣乃贊陛下
力行東封以為繼成先志先帝嘗欲北平幽朔西取繼
邈大勲未集用付陛下則羣臣未嘗獻一謀畫一策以
佐陛下繼先帝之志者反務卑辭重幣求和於契丹虜
國糜爵姑息於繼邈曾不思主辱臣死為可戒誣下罔
上為可羞撰造祥瑞假托鬼神纔畢東封便議西幸輕
勞車駕虐害饑民冀其無事往還便謂成大勲績是陛

下以祖宗艱難之業為姦邪僥倖之資臣所以長歎而
痛哭也夫天地神祇聰明正直作善降之百祥作不善
降之百殃未聞專事違且盭盭可邀福祥春秋傳曰國
之將興聽於民將亡聽於神愚臣非敢妄議惟陛下終
賜裁擇後天下數有災變又言古者五載巡狩有國之
事爾非必有紫氣黃雲然後登封嘉禾異草然後省方
也今野鷗山鹿郡國交奏秋旱冬雷羣臣率賀退而腹
非竊笑者比比皆是孰謂上天為可罔下民為可愚後

世為可欺乎人情如此所損不細惟陛下深鑒其妄

諫宦官養子疏

吳及

臣聞官師相規工執藝事以諫臣幸得待罪法吏輒原
刑法之本以効愚忠切惟前世肉刑之設斷支體刻肌
膚使終身不息漢文感緹縈之言易之鞭箠然已死而
笞未止外有輕刑之意其實殺人祖宗鑒既往之弊蠲
除煩苛始用折杖之法新天下耳目茲蓋曠古聖賢思
所未至陛下深惻民隱親覽庶獄歷世用刑無如本朝

之平怒宜乎天降之祥而方當隆盛之時未享繼嗣之慶臣竊惑焉或者宦官太多而陛下未悟也何則肉刑之五一曰宮古人慎之重絕人之世今則宦官之家競求他子勦絕人理希求爵命童幼何罪陷於刀鋸因而夭死者未易悉數夫有疾而夭治世所羞况無疾乎有罪而宮前王不忍况無罪乎臣聞漢永平之際中常侍四員小黃門十人爾唐太宗定制無得踰百員且以祖宗近事較之祖宗時宦官凡幾何人今凡幾何人臣愚

以謂胎卵傷而鳳凰不至宦官多而繼嗣未育也伏望
順陽春生育之令濬發德音詳為條禁進獻宦官一切
權罷擅宮童幼寘以重法若然則天心必應聖嗣必廣
召福祥安宗廟之策無先於此

論邊事疏

賈昌朝

太祖初有天下鑒唐末五代方鎮武臣士兵牙校之盛
盡取其權當時以為萬世之利及太宗時所命將帥率
多攀附舊臣親姻貴冑賞重於罰威不逮恩而猶仗神

靈稟成筭出師禦寇所向有功自此以來兵不復振近
歲恩倖子弟飾厨傳治名譽多非勛勞坐取武爵其志
不過利轉遷之速俸賜之厚禦侮平患何患於此然乘
邊鄙無事尚得以自容自西羗之叛驟擇將領鳩集士
衆士不素練固難指迹將未得人豈免屢易以屢易之
將馭不練之士故戰則必敗此削方鎮兵權太甚之弊
也且親舊恩倖任軍職者出即為將帥素不曉兵一旦
付以千萬卒之命為庸人驅之死地此用親舊恩倖之

弊也臣以謂守方鎮者無數更易管軍職任并刺史以
上官秩宜謹其所授以待有功如楊崇勛李昭亮輩皆
恩倖之人尚在邊任宜速選人代之此救弊之端也陛
下有意聽臣臣請復陳當今備邊之尤切者六事一曰
馭將帥古之帝王以恩威馭將帥以賞罰馭士卒故軍
政行而戰功集乾德中詔王全斌等伐蜀是冬天雪太
祖御講武殿羶幄顧左右曰今日居此幄尚寒不可禦
况伐蜀將士乎即脫所服貂裘暖帽遣中使馳賜全斌

此御之以恩也又曹彬李漢瓊田欽祥討江南召彬至
前立漢瓊等於後授匣劍曰自副將而下不用命者得
專戮之漢瓊等股慄而退此御之以威也今每命帥將
必先疑貳非近倖不信非姻舊不委錫與金帛巨萬而
心無感悅者以例所當得也蓋承前一階用例至舉兵
之際須特出非常然後可以動其心也又陝西四路自
總管而下鈐轄都監巡檢之屬悉參軍政謀之未成事
已先漏彼可則我否上行則下戾雖有主將不專號令

故動則必敗也請自今命將去疑貳推恩意捨其小節責以大效爵賞威刑皆得便宜從事偏裨而下有不聽令者以軍法論至於筦權賦稅供軍庫之物使皆得用之太祖雖朘削武臣之權然邊將一時賞罰及用財集事則皆聽其自專有功則必賞此所謂馭將之道也其二曰復土兵今河北河東彊壯陝西弓箭手之類蓋土兵遺法也且夷狄居苦寒砂磧之地惡衣糲食好馭善射自古禦寇却敵非此不可然河北鄉軍其廢已久陝

西土兵屢為賊破其存者十無二三臣以謂河北河東
強壯已詔近臣詳定法制宜因閱習視其人武力兵技
之優劣又擇其家丁夫之壯者以代老弱每鄉為軍其
材能絕類者籍其姓名而遞補之陝西蕃落弓箭手貪
召募錢物利月入俸糧多就黥湮混為營兵今宜優復
田疇安其廬舍使力耕死戰世為邊用則可以減屯戍
而省其供餽為不易之利內地州縣增置弓手亦當約
如鄉軍之法而閱試之其三曰訓營卒太祖朝下令諸

軍毋食肉衣帛營舍之門有鬻酒者則逐去士卒有服
繒帛者則笞責之異時被甲鎧冒風霜攻苦服勞無不
一當百今營卒驕惰臨敵無勇此殆素所資用之過也
舊例三年轉員謂之落權正授雖未能易此制即不必
一例使為總管鈐轄宜於其間擇有才勇可任將帥者
授之又今之兵器多名詭狀製造不精不適用於虛費
民力宜按八陣之法依五兵之用以時而教習使啓殿
有次序左右有形勢前後相附上下相援令之曰失一

隊長則斬一隊何慮衆不為用乎其四曰制遼夏今敵
蕩然與中國通北方諸國則臣契丹其西諸國則臣元
昊而二邊合從有犄角中國之勢就使西戎來服不免
與之重賄是朝廷歲遺二邊不可勝計古之備邊西則
金城上郡北則雲中鴈門今自滄之秦絲亘數千里非
有山海峻深之阻獨恃州縣鎮戍爾凡歲所供贍又不
下數十萬以天下歲入之數纔可取足而一穀不熟則
或至狼狽也契丹近歲兼用燕人治國建官一同中夏

吳賊據河南列郡而行賞罰善於用人此中國之患也
宜度西域諸國如沙州喃廝明珠滅截之族近北如黑
水女真高麗新羅之屬舊同中國今為二邊隔絕可募
人往使誘之來朝如此則二邊必憾憾則為備備則勢
分此中國之利也其五曰綏蕃部屬戶者邊垂之屏翰
也如延有金明府有豐州皆戎人內附之地朝廷恩威
不立撫馭乖方北為強敵脅從而塞上諸州藐焉孤壘
蕃部既壞土兵亦哀恐未有破敵之期請令陝西諸路

緣邊知州軍皆帶安撫蕃部之名多設方畧務在招集財賦法令得以自專擇其族盛而有勞者以為首帥如河東折氏高氏之比庶可為吾藩籬之固其六曰謹規候古者守封疆出師旅居則有行人覘國戰則有前茅慮無其審謹若此太祖命李漢超鎮關南馬仁瑀守瀛州韓令坤鎮常山賀惟忠守益州何繼筠領棣州郭進控西山武守琪戍晉陽李謙溥守慶州董遵誨屯環州王彥昇守原州馮繼業鎮靈武堯權之利悉輸軍中仍

聽貿易而免其征稅許募勇士以為爪牙故邊臣富於財得養死力為間諜夷狄情狀無不預知二十年間無西北之憂善用將帥精於覘候之所致也今西鄙刺事者所遺不過錢數千畧涉境土盜聽傳言塞命而已故虜情賊狀與夫山川道路險易之利勢絕而莫通夫蹈不測之戎入萬死之地覘伺微密探索機會非有重賂厚賞孰肯自效乎願鑒藝祖任將帥之制邊城財用一切委之專使養勇士為爪牙而臨戰自衛無殺將之辱

募死力為覘候而望敵知來免陷兵之耻也

文章辨體彙選卷一百